

錢文敏公全集

茶山詩鈔卷之九

武進錢維城稼軒著

弟維屏

維喬編次

姪

鐸

伯壻致純

校字

子中銑

中鉅

丙戌

香樹師以社日觀種盆荷詩書扇子見寄依韻申

謝

自違君子座長憶妙變身近水非無月空江别有人何
期吹雁字特與洒龍賓發篋已忘暑看花想出塵一池
情所愛千里意相親盪漿輸吳女溪邊共采蘋

題畫雜咏五首

海棠梨花

高燭休相照溶溶記月痕一般愁寂寞春雨不開門

人面桃

一顧嫣然笑傾城只獨知似曾相識處朱鳥暗窺時

桂花

一種秋光好嫦娥意獨親祇緣修月斧忙殺讀書人

秋海棠

昔日樹頭花今爲階下草江頭逢五君試訪杜陵老

月季

萬卉有開謝此花常自紅誰於三友外驗取耐寒叢

題畫二首贈耐圃司農卽送之灤河

野水平橋屋數間
暖雲晴翠撲空閒
朝來紗帽峯邊看
還似城西一角山

的的紅粧剪剪絲
行廬清供恰相宜
試叅秋雨新涼味
何似春燈罷舞時

題荷花用兒子中銑韻

悵望平湖十里塘
輕風颺院溯中央
凌波作賦朝迎旭
隔岸懷人夜有霜
鴛枕未違秋浦夢
錦襪猶試越溪香
年來誰和吳娘曲
別緒牽絲爾許長

題大瓢山人像

先生姓楊名賓大父懿達前明御史甲申殉節父越謫戍寧古塔先

生年十七叩闕乞省親至則父死遂負骸骨歸葬舉鴻博不就以布衣終

雲雷之屯忠孝之事經綸之本無用有用廓其有容睢

肝其目而茫洋其胸噫嘻乎公

題雞鳴圖四首

蘭闌相警凜司晨夢裏蠅聲聽未真迢遞南天霜月滿
寢門笄總屬何人

攬衣趨直每殘更絳幘傳呼萬燭銀莫忘置身閭闔裏
板橋茅店有人行

朝朝騎馬欲雞栖院柳參差自不迷明早出門還冒暗
三更烏柏又空啼

幃燈隱隱接天明傍舍曾驚夜讀聲

少年讀書孫公園常達旦張侍御重

光聞而興之過訪乃敘世講侍御大人同年友也

今日辛勤課兒輩不忘甘苦

卅年情

題吳人鳳墨菊

人鳳工寫生棄家習浮屠氏之學

寫菊先寫神要使胸中無點塵
虛窗蕭寥豁秋氣秀眉削骨何許人
籬根霜風吹碧草南國繁花前日好
酪漿燔炙非世情淡墨清尊合傾倒
先生手作萬彙春紅英翠葉瞥眼新
枯禪已改居士格我使天女來傳真

秋夜作

閒階飄一葉客子中夜起秋風爲誰來
能攬夢中耳星河寂萬戶微月在樹裏
嘹嘹送征鴻南雲日千里

題畫贈戴實士

江檻風湍記草堂幾人凡骨得仙方
趨庭未許宗文學留與千秋一瓣香

題畫贈戴蓮士

芙蓉朵朵倚青穹丹碧前盟在此中頭白仙人讀書處

錦袍三尺屬終童

三戴爲篋圖侍御令子皆以穎悟聞

題橘綠橙黃蟹正肥圖二首

中秋日寫

紅葉林邊欸乃歌盤飧斗酒奈愁何江村風味秋來好

今夜月明鄉思多

鮮摘露珠涼沁齒暖蒸霜甲細探螯秋風一樣尊鱸思

不比東坡是老饕

爲春和相國題畫雜詩十首

陟山常苦疲塵鞅兼朱屏豈若事臥遊雲壑在俄頃蕭
辰拂絹素放筆寫清景垂蘿暗絕谷密樹翳遙嶺溪流

忽動搖顛倒陵巒影讀畫如看山相對百緣靜樵獵本
有營境寂意常騁寄語巘樓人徒勞慕張邴

水雲淼淼浮天遠無數青山暮靄濃忽見一峯依白塔
似聞空外起疎鐘

幾曲蒼灣縱棹尋清暉真可滌塵襟瀑泉暗響不知處
紅樹碧雲深復深

青山臨水結茆菴秋老霜多萬木酣閒倚高齋凝遠眺
數峰天外碧於簪

眼底開林壑松扉盡日閒溪深寒葍聚谷暗暮雲還幽
徑生苔蘚清泉落珞環無人其來往鳥語自間關
絕巘阻登陟如聞谷泉響巘前結圓茅松竹自蕭爽想

像山中人幽棲謝塵網玉華倘見貽青霞會孤往
老屋秋樹根坐聽山泉響蓬門頽返照新月東峯上
萬峰倚層霄白雲不在外時聞澗底泉遙和松間簫
清溪轉雲林發興欲深往夕峰罨蒼翠猶聽烟中槩
秋在水聲楓葉人尋澗戶溪橋倚徙忽迷歸路白雲又
起巘腰

九月四日夢堂司農招遊獨往園賞桂時有海棠
一樹繁盛欺春戲爲折枝并係短句八首

名占東華獨往園小山叢裏訂花旗白雲紅樹添生色
知是西風第幾番

籬下牆根旦漫誇夕陽樓畔有明霞憑誰借得吳剛斧

并斫昌州第一花

莫教青女傍柔枝嬌格煙扶一縷絲嬾逐東風鬪眉媚
還愁秋柳妬腰支

簾捲珍珠最上頭登高仍作冶春遊試教崔老彈新曲
別有瀟湘水上秋

金粟紫綿聯密諦色香合証淨中因未乾額粉參禪悅
不道如來是後身

清淚何曾濕網紗神仙有分說天涯階頭怨女今相識

可許桃根是一家

秋海棠或云怨女懷人淚點所化

破除成格荷東皇碎剪晴霞佐菊觴況是題糕徵子固
休言有恨不能香

一年兩度看春來昨夜涼風尙有雷羅幌未開紅作陣
滿城風雨又相催

贈漫士前輩 有序

九月廿又五日晨集福苑門少宰何公告余曰
昨日夜涼人間合有私語蒙有猜焉作惱公四
章以調之

一盞香醪日日同竹林幽徑幾時通阿咸剗馬深更去
已入山公啟事中

月淺雲深秘莫知也應青鳥報先期如何暗渡銀潢去
不許人間乞巧絲

席卷龍鬚生網絲西軒微月過來遲只緣愛踏東西水

惹得人傳織錦辭

楊柳櫻桃次第深
樂天詩句有人吟
愛公自得溫柔報
山谷安知造物心

題李漪亭板輿歸養圖

法家競毛鷲仁者庶有瘳
要以心如春濟彼令似秋文
忠述遺訓賢毋工貽謀求生兩無憾
千古名言留藹藹
我李公當於古人求和風煦漸水一洗薄俗偷
我昨乘輶車促席歡言酬登堂展夙分
惠好敦前修鴻翻隨劍
風翠羽嬉南洲三年一形影分手吳山頭

天子崇孝治陳情許歸休
吾聞卧轍人老少爭攜倚手
把一壺酒效筭千百籌
菰蓰寶帶東湖水長悠悠堂中

懸

寶翰階下芝英抽念茲慈孝積總自仁恕流我猶官法
曹夙夜敢自由惟恐一不慎上貽老親憂老親守家園
千里雲山稠雖能免饑寒同此強健不與公僅隔郡信
宿通扁舟南望不可見寸心有千愁何時遂初志共誓
斑衣遊

查梧岡民部送菊花餅詩以謝之得三首

每覺東籬秀可餐騷人漫語亦無端今朝食譜增新味
脆嚼庭前白露團

榆莢籐花佐食蔬一春采掇已無餘秋來退直多幽興
添註前人說餅書

滋味曾於酒盞嘗煎熬小試食單方五更
嚙嚙饑腸轉
尚有凝霜隔晚香

爲張大星題黃子久山水卷子歌

有元山水推四家虞山大癡獨稱首元氣全歸造化師
神機自赴煙雲手真蹟通靈盡上天尺幅何年六丁守
富平公子雅嗜奇故紙百萬日夕披舉頭放眼合冥漠
千載神物來投知如黃遇黃妙莫喻豈有鼎俎能充饑
世間財物散復聚此卷一失誰能追明珠尺璧天地產
疇起白骨重臨池鵬鴒竟解何足惜對茲不怕寒無衣
顧我生平乏仙骨親送嫦娥入明月桃源再問已迷津
回首空餘六州鐵張公子黃大癡還君兩美君勿疑我

畏相如睨柱時

海天浴日研子歌

故人貽我海天石此石采自扶桑邊陽精吞吐孕靈質
天地秘惜靈深淵麻姑過此愛清淺鳥爪剔淨蛟螭涎
雷霆施斧鬼運巧闕然孤日摩空天波濤蕩滿赫發動
潏潏元氣蒸烏煙卷然一握美人手脉脉似有津生咽
琅玕斑銜鳳凰尾鸛鵒眼滴珍珠泉摩挲盡日一不置
如晤良友歡無言此生當著幾緡屐古來奇癖皆名賢
何如傾身障簿簾老死刺促謀金錢出逢山水寄笑傲
八對簡策窮鑽研磨人磨墨兩勿論兀兀足以窮吾年
我飲不豪亦一斗我詩不工亦百篇貧窮利達有天命

文章豈亦關前緣怪來搖筆勢汹涌海潮只在池中翻
得黃子久山水小幅喜題

買玉得羊亦不惡况逢繭紙定武作昔時覲面終失之
今日自來非力索老妻憐我貧不能傾倒筐箱踐宿諾
從此虞山落掌中不慮虛舟移大壑一峰與我信有緣
回笑東屏虛作虐

寄樹參弟南中

木落長河霜信催夕陽天畔獨登臺三年聽雨平生話
一昔臨風去住杯聞道鴈原方急難坐拋鴻渚未歸來
高堂愁鬢燕山雪目盡南雲亘不開

題果蓏七種贈中書舍人趙損之

七種堆同菜甲看熟紅生翠露珠團筆頭活計貧家業
便作芳隣餽歲盤

丁亥春帖子三首

紀盛該元化書年歲德新願持椒綴字二萬六千春

長養風來當冒茆天心妙合在

元辰

立春時
在辛卯

陽春信自

宸居轉載得青旂

祀上辛

東郊遙望海門東淑氣初回旭日紅待澤農民頻計日

迎

鑾數遍十番風

花信五日一番自立春
至政變凡越五十日

丁亥

題人面桃

粉蝶無心過短籬
誰家巧露出牆枝
東風不少宜春面
却是劉郎未得窺

題古松葡萄

老龍吟罷一踟躕
玉女求參物外軀
莫怪枯禪成束縛

天花還結女珊瑚

一作水晶珠

題梨花

美人如玉倚深宵
月色溶溶伴寂寥
那得身爲雙燕子
銜將柳絮上輕綃

題竹菊

采采東籬醉酒卮南山一角果幽期先生自賦歸來後
不愛楊枝愛竹枝

題雜花四種

馬蘭

蒲公英

雞冠

晚香玉

紫羅黃袂足風流小院鳴箏暑似秋且莫聞雞便起舞
晚香留客玉搔頭

題梅竹贈阿紳姪二首

故鄉有夢大江南北色風聲醉後探我亦浮雲千里外
只圖春信報平安

卑枝結蕊解依人高節凌雲自可伸勸汝莫愁寒徹骨
艱難好養雪中身

寄翹英壻

我愛崔秋浦傾心玉鏡臺家貧緣薄宦身弱爲多才蒲
坂三冬雪蘭陵一樹梅何時吹玉管彩鳳與俱來

寄孟錡

平生珠一顆掌上惜多年留向芙蓉浦空懷明月篇豈
伊忘膝下爲我奉堂前何事頻支枕愁心滿海天

白馬篇贈滇黔制府大司馬承恩毅勇公

白馬大宛來銀鞍金鑿落錦袍才子上將軍騎過河源
清大漠將軍登壇未三十策勲早上凌煙閣將軍胸羅
八陣圖將軍腹藏萬卷書活人無算口不道輕裘緩帶
眞吾儒大交炎炎枝鹿野枯藤纏頭生漆踝秦時舊關
將荆江漢使今推大司馬昆明池水象滇池海螺鼉鼓

天王旗樓船百丈且莫動踣鐵新鑿騏驎蹄騏驎翻蹄
驚掣電黃金鑄印彤弓箭將軍拜受

蓬萊宮攬衣上馬氣若虹馬頭已見機槍空宛馬來奮
蘭筋口噴朔雪開蠻雲梢梢驥尾吹氛塵夔嘯蛇擲亡
其羣武侯廿七中郎將將軍才氣與俱壯南人聞之心
胆喪蠻奴不敢騎大象此時將軍未出都先聲列缺爲
前驅排門塞穴打銅鼓手抱項領求腰軀君不信聽我
辭伊西淖爾巉得硯頗頤萬輩推爲泥井中蛙鼃安足
管宛馬來綰青絲今年楊柳生新綠明年楊柳生新枝
披風捲霧往來易朝浴南溟暮秣薊重開
郊壇迓天駟蜀錦障泥屬鋪地

次韻奉和望山相公

南苑夜話見贈之作二首

相國離宮退直時手攜後進話遲遲海門夜月清行色
江介春雲繫去思淀水題廣前路景擬山韻次隔年詩
二律爲相國督金陵時與雙有亭前輩倡和原韻 深宵屢侍光風座鄙吝潛消
自不知

苑路晴花綻幾星三朝移帳未曾停直將立馬行春盞
并作挑燈問字亭綠野待開臨水碧
公賜園在紅門且紅橋東
喜對山青藥欄後約催詩畫芳草如茵正滿垌

敬題觀海圖

有序

皇帝導兩淀清渾之水達於直沽至於東海海旣若矣

乃益

霈大澤錫租寬逋減罪廣額士商兵農莫不咸被考之
詩書翕河巡岳於典爲優謹就所見繪爲觀海圖
恭錄

御製詩於卷首并擬古歌一章附題卷末蓋言之不足
故長言之亦觀於海者難爲水矣

禹貢首冀州導川自畿甸虞巡二月岱水土未兼繕
聖人盛舉邁古初帝興王謨實同見直沽自古號析津
幽并百派交齋淪

皇都東下三百里瀛漠漠漠朝宗尊

春巡蒞止海波靜收攝清渾澹如鏡百川以海爲歸墟

海既受職羣效命遂敷

渥澤澤我氓亦如大海渾無疆我田我宅我衣裳于場
于圃于郊庠民咸歌歌且舞我

皇來得我所海濱信宿

鸞旂回遮道欲留復遲徊願

皇歲歲爲我來我爲海邊蟲隨春翔舞遊和風

客有談天水遺聞者感而賦之

天水遺聞常熟閩秀所作

名王猶記舊中華卷土重來報已除何處移家餘牡蠣
一時上馬有琵琶忠臣血淚黃龍酒故主冤魂白雁沙
不是南城能返旆千秋未信主和差

題畫蘭贈樹參弟

時初從南來

故國經年屬望頻
南風吹到夢中身
與君並命爲香草
別有天懷臭味親

題萬樹園八景

萬樹園

入山何必深平地有深處誰云十丈塵
早隔萬株樹

桐雨齋

明河清且微
梧桐夜來雨
素琴張高齋
秋懷澹如許

半園

萬事何求全
名園止得半
清池圓若鏡
分與閒鷗玩

意中亭

幽想出象外
方亭界園中
乾坤容一箇
雙鬢與天風

桃花堰

隔堰聞犬吠何人外間來白雲溪正遠桃花開未開

鳳尾泉

知是甘如醴青鸞曾掃尾一勺沁詩脾茶煙過竹裏

藕花居

何須涉江去簾外見美人采采將有贈棹歌隔通津

秋水池

海若何必矜河伯何必喜吾心自然定秋水一鑑耳

題畫贈儲梅夫宗丞卽送南歸二首

朝衫斲解賦歸來三徑塵踪待客開
除却松風吹屋角不知門外有輕雷

故鄉煙水大雷東歸去扁舟一笛風只恐灣頭明月好
未容帆影別匆匆

後白馬篇贈豐亭司寇參贊雲南軍

白馬雙玉驤來自西極東長軀雪立呼爲龍兩龍一心
成大功前者騰驤疾於鳥後者追風迹如掃炎荒蠻洞
敢伏戎雲羅布空兩驤褒白馬來駕雙旌昨送毅勇今
豐亭豐亭新平烏什城夙與毅勇同威名譬如連鑣獵
廣莫大黃血發百獸驚送君南征無返顧韓范齊驅就
熟路我知南蠻井底蛙不及西戎草中兔我有千里心
望君隔青岑絕塵去我何由尋伏櫪摧藏徒沉吟平生
已託寒風子君去誰憐腕中齒黃金築臺待君歸莫教

貪飲天池水

和樹參弟出都留贈原韻

殿頭徵賦動西京
江外拋書事北征
豈謂茫茫雲海路
徒勞僕僕燕鴻情
窮愁我未輸豪興
落寞君休恨別聲
好勸老親來日下
天涯春酒得同傾

盧蓮麓以畫冊索題走筆贈之

平生不能畫好畫
乃性生不於古人求
無以成其名
石渠富煙雲片紙世所驚
廿年事編摩頗亦探其扁
名家有大小妙理無岐程
要在能運筆書譜實畫經
一筆有不見此筆爲無情
筆筆皆可見合之成至精
渲以墨濃淡如罔附骨成淡不與濃
合濃不與淡爭濃淡每相

讓筆墨各分明結構起於午來往一縱橫此非任口語
多見識自瑩至其精微處各係乎性靈盧生倘欲學試
以吾言評

題邵味閒先生擊壤圖遺像

蕩蕩兮太空浩浩乎長風吾無以測之吾悠然而見先
生之遺容虞山之旁湖海若一先生宅之心曠神逸朝
啟南榮石榻橫膝澹然忘言日入月出竹風蕭蕭梧桐
未凋烏知塵世人聲上潮家累萬金浮雲去之我書我
讀子孫與之噫嘻乎伊耆氏之民耶乃今遇之

於瘴石宮詹處借得吳仲圭墨竹一卷愛玩數日
因題長句

仲圭寫竹妙今古家有收藏不勝數
蔣石先生獨得真紛紛質本皆塵土
去秋新鑿過高齋空窗無人與竹語
開卷先浮谷口雲當天欲墜湘中雨
馳情一載刻不閒坐卧只在淋漓間
多君許我仍借閱五口不出畫掩關
摩娑豈盡个中趣但覺煙雲繞身住
一枝一葉悉天工尙有天工不到處
平生愛竹成奇癖處處移栽滿新宅
今看墨采撲空來翻謂簞籥遜高格
想其得意落筆時胸中撐滿參天枝
鸞龍飛走杳莫測只今猶有清風吹
文同李衍去已遠孟端仲山又不返
人間閒殺娟娟姿松樹梅花氣俱短
今年夏初雨澤疎西軒舊叢大半枯
但得招魂入此卷何須搔首臨前除
葉公之好乃真好

願棄一切常臨摹知君秘惜不久借安得與君並宅居

秋日寫牡丹寄塞上

苔痕露漬繡芳茵玉佩招要絕點塵此日關門楊柳綠
西風猶見洛陽春

題畫雜詠九首

紫藤牡丹

洛陽勝地草如茵幾處名園颺麴塵借得石家紫綵幃
曉雲圍住玉樓春

玉蘭桃花牡丹

玉屑融雲膩曉粧仙臺無樹不飛香借來春色三千歲
始信人間富貴長

貼梗海棠野薔薇

養得仙家九轉丹玉清應愛火珠冠更饒一架三霄露
不怕人間夜氣寒

菊花秋海棠

籬下牆根趁曉陰霜顏露靨結知音不妨一盞柴桑酒
消盡臨風怨女心

秋花九種

商風一夜落閒庭散作瓊枝滿院馨幽客自收桐葉露
曉窗寫得九秋屏

臘梅天竹月季

檀心珊寶共團圓別與人間作歲寒莫道雪中花事少

春工長耐四時看

玉堂春

華清高格舊超羣
綠被同翻對夕熏
欲識人間真富貴
階前玉樹又凌雲

桃花黃薔薇

七夕曾留天上種
曉風吹滿海西霞
雙成舊是瑤池客
莫怪新粧伴道家

桃花芍藥

紅雨方酣滿院霏
慢持婪尾送將歸
珠簾捲盡宜春面
只愛筵前金帶圍

題雁山小幅

人家芙蓉村萬壑列戶隔一徑度野橋松杉起清奏虛
亭澹忘歸煙暝局已叩梅雨洒白巖竹雲鎖青岫舊遊
別千里幽夢發當畫興到一拈臺山靈解奔走

題寶京兆太翁授經圖

有序

東臯京兆以太翁小像屬余補圖將爲八十壽
未成而太翁卒題此以薦靈几

高堂首三樂膝下實多懼何來千歲椿忽感風前樹瑯
琊寶夫子虎觀踔高步經術卽事功道自趨庭具燕山
推老桂月脇得仙慮八十顏青童一編忘日暮傳經命
作繪擬爲稱觴御未得介華筵何由企靈馭無窮孝子
意不朽先人譽著作本談彪成書在遷固要知重手澤

豈獨珍尺素夢奠有遺言披圖瞻言顧

山水幃子歌贈問亭方制府七十壽

神仙必蓬瀛朱紫本芳素白傅初無富貴心謝公最有
登臨趣節門朝啟冠蓋闕人言大府開華筵炊金饌玉
公不愛我知公在山水間山水千萬里白雲座中起厭
說三神碧海深三神卽此堂前是借公堂前八尺屏寫
我眼底萬疊青石泉煙竇對舞雪風柯露葉來吹笙古
來名畫不可得俗手描摹况促逼但能邀賞付琴尊便
是通靈生羽翼生羽翼搖旌旗赤松子來何遲不妨華
紱坐鸞背長作人間雲雨師

題莊書年先生引鶴圖二首

仙客蘇耽愛蜀吟碧山遊遍便抽簪
經庭近日彈琴好
一一清聲和在陰

林下人推二老賢
髫時扶杖憶周旋
於今華表無消息

遺墨驚心四十年

卷中有先祖題句恍憶南園過從時也

題王石谷未竟山水

淡渲輕描各有姿
亂頭粗服總相宜
似從鏡裏窺螺髻
愛是新粧未罷時

應

制題雪景

聖心勤率育

天意足滋培
以此豐年瑞
定徵炎徼開
寒消銅壁瘴
風

掃瓦城灰側想瑤林裏紅旗撒影來

戊子春帖子三首

緬古命賔日甸師占大盈盡知三白瑞平秩及西成

句首

合緬句盡平四字

一枝芳信自南通月半嘉平有好風三素乍移春仗裏

捷傳雲采日方中

立春在十六日午正二刻句首合一月三提四字

四方協應集休徵寶字全歸淑氣蒸永日雲霞護王母

清時瓜瓞頌孫曾

句首合四游永清四字

茶山詩鈔卷之十

武進錢維城稼軒著

弟維屏

維喬編次

姪

鉞

伯珩

子中銑

致純

校字

戊子

題海山周少司馬泛海登舟圖

周公銜命封琉球麒麟蹙補衣蟠蚪揚帆振節氣軒舉
撞鐘伐鼓聲喧咻軍民塞塗令牧走雲山排空天地浮
洪漣蹣跼來登舟平生壯志此初發突過鼉身見一髮
我聞颼颼曾憑陵公謂蛟龍躬款謁島夷大長道旁俯
畏公神明對公舞金帛何勞陸賈求山川還用馬援諧

歸來詩篇紛可數波濤不著一塵土示我幾冊中山書
兼有長卷登舟圖登舟放洋使去聲事始宣威拔險皆其
餘方今

聖德彌八瀛流沙旣被開南溟虎臣汗馬闢疆宇儒生
博帶趨

承明風雲到眼人俱驚封侯敢說輕投筆自顧曾無縛
雞力羨君破浪出鴻濛卽是長驅度沙磧酒酣一放海
天謠濡毫更向雲臺壁

祝中丞吳二南先生雙壽

廬山高高則另五老上青霄銀虹三千尺匡嶺本是紫
府人時來復與廬山親泰岱之雲觸石起青牛谷口桃

花春公自東來秉畫戟東溟移作西江澤萬口齊聲樂
只歌千秋合展長生籍洞邊毛竹多子孫本公金母來
相存平生不識希有鳥毛羽十萬爲輪轅我有紫霞觴
滿斟青玉液南斗明星遠可攀西山晴雲望無極馬當
倘肯惠長風後堂絲管猶堪卽

英夢堂司農以上元日雪十六日雨二律見示依
韻酬之

正有踏歌興無嫌酒力微如何滿城雪偏繞上元飛側
想兔園宴未應賓客稀梅花堪命駕何日倒吾衣
新蟾羞乍瘦故作雨微微不管燒燈興餘觴爲爾飛柑
香傳客散屐響欬關稀幸有分光曲高吟一振衣

樹參弟以梅花三疊十二章見寄寓意淒婉大得
風人之致予恐其意有所鬱結作此廣之仍用其
韻得詩四首時同作者金壇司農

一枝何處訪前盟雁影天南雪滿城幽興自拋林下久
鄉愁多傍月中生不堪歲暮懷人遠豈意春先與物爭
料得垂垂江畔樹鬢絲好在未催成

見說孤芳鎮倚闌春風冷暖亦多端漫將翠羽三更夢
只作紅塵十里看天地何心終澹泊神仙有骨在清寒
溪西暫爾勾留住折贈無愁道路難

吹笛高樓忽愴神忍將辛苦鬪時新空山信美難遺世
涼月多情最近人不解殷勤惟鐵石便教富貴亦埃塵

卽今官閣裁詩客未讓逋翁獨耐貧

雖分南北不分枝兩地逢春一種思折簡未容高卧早
巡檐應笑得歸遲生成猜意冰霜薄臭味驚心夢寐知
何日移根到瑤圃綺窗青鬢趁時宜

題蘇東坡墨竹卷二首

仲圭墨譜舊摩娑古韻悠然學未過今日晴窗展長卷
瓣香傳自大蘇多

蕭蕭欲動過牆風恰是庭前落影空自有鵝溪千丈絹
何須巧句戲文同

題楊豆村無雙傳樂府後四首

同著黃衫豈見疑忍將一劍送蛾眉我知姪女凌波日

定是媧皇煉石時

死者能生生不死離中忽合合偏離英雄兒女俱無賴
只有神仙是我師

田光勿向荆卿激
荆徹烹緣韓信悲
不露端倪拂衣去
黃金難鑄女鵲夷

尙書歌舞逐雲移
觴詠東臯又一時
門巷卽今誰管領
春風紅豆譜新詞

東臯園本曹尚書故第後歸靜山先生易絲竹爲吟詠見邵清門記中

寄樹參弟

屢接春前句都爲歲暮愁
恨君非美酒贈我不消憂
藥餌閨中命饔飧堂上謀
那堪往來夢空向白雲求

寄示孟鈿

汝病幾時好吾懷何日開庭幃方有信舟楫倘俱來
雪逃江國南雲接薊臺中宵多羽翼飛去每千回

題折枝桃花寄蔣覲揚二首

蕩口幽居滿白雪蓮塘十畝見清芬西湖隄畔三年別
桃片紛飛又憶君

桃花紅間刺梅黃不盡高齋滿院香輕易休矜寫生手

先生掌上有春光

覲揚精岐黃術

問亭方制府於錢叔寶四清圖後作小像并命予
盞予爲作折枝牡丹並題二律

古香留寫意新藻妙傳神元氣歸沖抱春工付大鈞
芳原故物采擷在伊人誰識平津閣煙霞賞獨真

叔寶吾家秀流傳有四清誰於百年後曳杖此中行已
得神仙味何妨富貴情故將姚魏種一締歲寒盟

題周燮堂小像

燮堂老同年監郡近畿旬春明三百里終歲幾相見思
君若死水只繞樊輿縣客從上谷來照我岩下電誰道
柳條風吹出東君面披襟懷抱敞散帶丰神現松逕緬
孤吟蓮塘企清燕乃知夜來夢未足平生願芳郊膏陰
雨頌與春鶯囀圖畫在人心豈獨藉柔翰何用比顏色
銀蟾迴秋漢

題雙有亭前輩春郊課射圖次星齋先生韻

屢共藥韃到木蘭餓鳴鳴草塞霜乾短衣匹馬多餘興

芳樹春郊又改觀，畫卷詩篇爭錦埒。射堂子弟簇花蘭，
舊遊更憶紅薇省。退食分棚合署官，
向與有亭同官內閣學士每於午後在署較射日以爲常

讀孟鈿所寄詩

嬌女如嬌鳥，嚶鳴寄意微。吹來花底曲，勸我不如歸。
我思同滄海，蒼茫百感非。豈緣關塞隔，容易不南飛。

戲題桃柳鵲鴒贈錫菴宗伯

時鳥名花各占春，長廊畫永淨無塵。聰明學得雙鬟語，
並坐高枝欲喚人。

題畫二首

高齋一雨暑全收，潑作空窗滿幅秋。不識白雲溪外屋，

階前添長幾重流

疊嶂排空深且幽千章古木翠如浮白雲忽斷前山脚
一片飛泉出樹頭

伯起屬補漁村小景并題

髫齡嬉遊今幾人廣川伯子吾表親木巖屋角記同踞
竹書瓦研還相因大風揚舲雲覆海三神茫茫果誰在
已知梧石勝隨珠莫道棕簷遜車蓋吁嗟年過五十不
稱意長安悔就屠沽醉縱橫學得不歸來細柳將軍亦
兒戲芙蓉之湖碧琉璃藍花吹秋稻蟹肥龍游馬跡先
人居直鉤獨繭真吾師

仿東山師松栢梅竹圖疊壬午舊題韻

貞材無庸姿蒼岫竒挺闢是何神仙功移置雪色壁竹

梅世外賞仰契素心積一朝欣聚首七載傳合筆

東山畫松

栢訖予乃於隙處補竹梅其間多紛馳歲月未虛擲吳山及越水得

寸亦得尺東隣松映牖西澗梅當席栢堂緬坡翁新築

謀地隙雲棲梵刹古萬个森標格此其特著者餘復隨

處得邊雲遙蒼茫回首興不隔每當得意時千里共一

宅方秋企扈從一一記鴻跡竭來使事滿仍作蓬萊客

對舊寫新圖夙愧期一雪終讓東山公下風甘爲役

題慶雨林泉石清娛卷二首

韋平推世胄公子早知名眉宇江山秀詩篇水石清坐

來松有韻聽徹瀑無聲誰解探高致圖茲物外情

展卷歎相語年來把袂情長江春對酒大幄暮開枰邱
壑有同嗜襟懷無別縈松岩前路好得句與君賡

題畫竹

湖州譜不見秀水亦奇觀

仲圭墨竹譜在
澤石宮簷處

顛倒十尺絹

縱橫一萬竿別來孤月檻夢去得風湍今日重相憶邊
雲拂馬看

題畫梅

方春詩寄遠渺渺憶南枝不謂秋窗月還從塞嶺移雁
聲人去驛閣夜客窺池何必垂垂樹江邊足係思

題雨林圖贈慶五和原韻

春山一笠雨離離煙景西園

望山相國江南舊日垂曉
制府署中園名

樹期君同倚處夜窗愁我獨聽時白檀風急吹蘆管黃
浦江鳴濕柳枝幸有天涯兄弟在展圖仍作對牀詩

十八里臺贈王叟

時爲把總
司臺站

邊臺客大隱七十佩弓刀奔走甘牛後功名似馬曹課
孫耕釀酒留客坐炮羔別爾匆匆去前山暮雨霏

卽事

不遂趨庭願翻憐出塞頻長城寒月外飛夢亦艱辛
和夢堂司農見寄塞外舊作四首

盤古村

開闢自何代鴻荒乃有村循蜚無記載營窟孰留存跡
重生民始名追太古尊羣倫日雕鑿難得此胚渾

延慶州

延慶居庸北城當岔口寬榆林千嶂合芳草一坡寒沙

漲秋河窄時清故壘殘往來聞驛使嶺路出長安直北即長

安嶺榆林堡芳草坡皆地名

關外早行

朔風深夜急蒲子出關行海月到秋白雪山當帳明長
城寒不隔古塞夢難成獵火催晨騎何如使館情

廣寧遣興

昔年遼左使曾駐廣寧鞍跋馬三更月尋鐘百尺壇晴
風送海色溫井濯邊寒今日興安道重吟憶古歡庚辰冬結

介景菴宗伯出使盛京

望山相公以詩見訊依韻奉酬

上馬石磴山回頭望煙樹馳驅慙壯懷行止不同趣况
當秋曉節屢陟雲深處十里一止頓烹茶草中路朝催
獵火起暮逐營鴉度細水頻利涉佳山得移住松青風
欲落樺白雪更護割鮮暢同斟探險景獨步登高時見
遠不作鄉園慕恭承長者問詩札來無數射雁不墜翮
呈牋與將去

奉戎少保節制畿輔其幕府卽五十年前趨庭地
也少保有詩記之卽和其韻

保釐特與釣璜年

公久任封疆今以大司寇持節年正八秩

問寢依然秋月

天署有秋月堂額爲旌節再承新雨露松槐不改舊雲

天成南塘愛女所書

煙庭有蟠龍松臥

居留異代庾開府署爲前朝戚南塘都督府賦述

先疇班孟堅往日兒童今白首驂筠應憶稅桑田

珊瑚贈似

海底珊瑚樹連城價不虛交柯方有待結網竟何疎顏
色三年在滋培七尺餘莫辜泉客淚重濕漢皋裾

訪錫菴宗伯不遇留題

頻年有約過高齋今日空看一院花不是山中采茶去
歸來何必日西斜

金沙司農屬仿東山師松栢橫幅再疊壬午舊題

韻

吾師松栢姿貌已境獨闢山莊直何年霜氣噓在壁司

農歲扈從雅愛與時積揮洒坐其旁風濤壯椽筆臨樨
付下走名繭輕一擲橫斜謹科條寬窄嚴寸尺歸來綠
雲屋墨汁漬几席經營發大凡點綴彌小隙森然青翠
起那復拘舊格梅竹吾自具隨意意頗得不知東山翁
復有幾塵隔雨梧司農齋名好結構廊檻接

賜宅中多古圖書一一盡名跡以此廁其間母乃羞上
客如蒙勞之酒一斗湯沃雪醉後興或高淋漓堪再役

除夕

半生爭此夕心緒燭花知歲月分蓮漏鄉關到酒卮拙
成家似磬色養鬢先絲明早探春信南枝定北枝

己丑

元旦

始知難却壯努力懼無聞事業羞元鬢庭幃戀白雲一
官成早達此日見斜曛懶更持椒酒愁懷亂未分

喜晤楊奉弢少保

跨馬瘳新疾披幃接故交好風生鬢髮時雨在簷茅塞
草秋隨轡田蔬春佐庖晤言猶昨歲何分對雲旂

雨甚行李不至與峙堂前輩共宿

多情今夜雨勸我對牀眠童僕猶相慰蓬茅亦可憐更
深頻翦燭衣薄屢增綿莫任春池漲分流又隔年

別奉弢少保

明日清河道飛塵暗去旌送公如苑水

苑水過樊與城
按樊與卽今保

定
直到保陽城

題吳自堂小像

束髮結交今老蒼
桑乾夜別天蒼茫
欲作石尤不可得
勸君一杯三太息
十四臺前月色高

時自堂將赴十四臺

他時把

酒勞相憶君行意
氣多慨慷肯效斫
地如王郎休言治

行推第一人
世得失皆亡羊
昔君別我向武城
馬麟畫

梅照眼清

君初任嘉祥時曾以馬麟畫梅屬題

今君別我向塞北
古漁玉

張

號川寫竹壯行色
梅以比君姿
竹以比君德
但令顏色絕

風塵豈有冰霜到
胷臆對竹看梅
莫悵離東風
迅轉無淹期
明春坐我竹窗下
正是梅花初着枝

偶作

薄植迷今是高堂過古稀家貧敢辭祿命定每忘機庭
草催新句山雲疊故衣昵人申浦月夜夜欵荆扉

送人下第南歸

春色隨孤客飄飄去國深無端羅袂土不改竹窗陰啼
鳩方遲響班騅有倦心知音何在近歸日試彈琴

白髮

肯信吾將老其如明鏡中鬢絲輸木葉不獨畏秋風素
業憑伊薄新詩故欲工怪看隣叟砌嬌蕊未妨紅

夜坐有懷

石甌山頭月無人亦自高邊風吹木葉一夕作秋濤病
骨支猶定吟情強不豪八閩新有雁何以慰同袍

題姜藝圃琴鶴歸舟圖

昔與公別時公年方壯我方少今日重見公予髮蒼蒼
公未耄宦海風濤三十年依然留得貧時貌公今有子
爲郎官公今有暇來長安舊時策蹇傭書味今作腰纏
跨鶴觀翻思朔雲楚水分符日束縛何如此時逸何事
匆匆更欲歸寒山雪深采芝朮驪歌一曲我先行秋風
飲馬長城窟

巾笏山光祿於行帳中獲一麕獻之翼日卽以
頒賜金沙司農作詩紀之依韻奉和

徒博周陔外京

庖較獲餘

旌能問申伯作賦首相如例創

頒禽始勞酬息馬初獻豸擬幽雅乞脯陋顏書野食紛
採七歸遺剩笨輿金驅羣遜巧嘗鼎敢忘渠

塞山雲海歌

興安秋高霜氣急千山萬山石俱濕
此身何來海邊立鯨呿鼉擲翻輪囷地軸天經浩呼吸
回頭但覺一島孤不識萬馬何由入平吞犂确大漠包
復有溪澗通曉坳前峰黝黑後峰紫日所未接皆波濤
忽然歎欲動垠嶠寂爾呀呷澄纖毫中間突兀半欲露
只恐涯底深藏礁此時白露涵清霄空中結采成虹橋
金銀宮闕在何處縹緲

黃幄三山高周陟虎落茫無迹彎弓欲索蛟螭宅俊鶻
無聲碧嶠空尾閤一洩平沙斥已知龍氣得憑依猶訝
鰐身送潮汐平生幾到蓬萊宮錢塘以南遼陽東盪胸
汨目有如此更覺意盡天都峰望洋真見樽桑紅焉得
載我圖南風

過雲光洞不克赴有懷舊遊和補亭前輩遊雲光
洞韻

不解迷仙路丹梯咫尺違無人陪屐齒有客款巖扉示
我清吟好知公雅意微毫間驚突起霞外想紛霏吳越
天邊遠風帆海上歸嵯巔湖濊月峽口雨含暉千里雲
踪闕三年花片稀自逢新過雁只攬舊行衣古塞誰同

調前遊偶觸機故山猶夢寐詩酒且相依

和樹參弟歸舟見寄原韻二首

除却煙霞有是非休言一失便知稀故山夢好吾難去
上國名高子自歸避雪塞翎終北嚮搏風溟漲漫南飛
買田陽羨焉能待獻賦長楊且莫違

一壺寂寞一燈然似此沉埋枉費年畢竟詩書關命運
肯教貧病受人憐心懸中路惟君故期在良媒非我憊
白髮高堂相望切可宜愁眼對漣漣

和樹參弟見寄次東坡聞子由瘦韻

瘦不在肌肥豈肉九轉丹輪一甌粥此心久作碧玻璃
大藥非求赤蝙蝠君知我瘦君不肥香草同根本非俗

別來三月氣頗酣塞外臘脂上紅玉始知老馬利馳驅
千里纔消一石粟詩中念我獨依依夢裏見君猶鹿鹿
紙帳西風塊獨眠冷暖何人寄僮僕時弟悼亡未久縱使身輕
可上天紫燕雙雙笑黃鵠

和樹參弟見寄用東坡初別子由韻

我疑金銀臺何得築太清日月轉足底迴光詎能明神
仙亦老少未免勞其生霧琰發寡女亘古無人賡契濶
動隔世近亦幾萬程上方羅玉籍變換如棋枰難云守
元牝坐待瑤草萌以此謝白鶴人寰老柴荆豈不悟煎
膏長此戀鼎烹私心一得喪何必非公卿初平家季子
叱石成羊鳴弄琴冰壺洞發我蒼蠅聲我羸苦消渴俗

口方譏評側見翡翠巢力掃芙蓉城高秋獵興安大漠
山嶽嶸野火熾夜半飛走遑然驚羣弩殺鋌險我心澹
無爭射雉矢則亡看山目未盲煙霞愜當境龍虎存其
名邀君紫沂海且莫誇星精

應

制詠痕都斯坦玉杓

得十五刪

貢得西方杓徵符王母環蓮盞分辦大綿手印紋斑氣
與垂虹發標如戴斗彎酌斟

元化洽樽俎指揮間

過邯鄲不得晤張虞溪留寄

洛水招舟落照橫叢臺息馬又三更故人虛下陳蕃榻

明月誰吹綏氏笙
雞黍殷勤煩令子
風塵鞅掌憶先生
近成皇覽應多卷
豈獨看梅繼廣平

先生先任廣平令

過磁州贈于四

處處垂楊覆稻田
江南風景暮春天
若非雪點前宵幕
不道霜歆繞郭蓮
雲外泉源溢水澈
城頭姑射魯山懸
故人握手顏如玉
始信彈琴吏是仙

野燒

飛火落空山
眈然陰崖赤
初疑臨海岸
夜半扶桑坼
惟驚走燭龍
不見林與石
具舉負崇巒
旁輝射陡壁
燦空若有怒
爆嵌誰所逼
沸歟裊虛曲
迴薄無行迹
苦畏銀漢乾
先愁紫巖踣
魑魅叫嚙出
螻蟻敢自惜
似欲驅龍

蛇鴻荒與開闢南飛有征雁何處迴爾翮激越蒸晴霞
一破深宵黑纖纖初升月怯影早收魄得母火雲翻今
日日未夕維時近春陵光照白水白還思昆陽戰虎豹
紛跳躑躅車且莫遲前路煙燼塞迸裂猶聞聲稍進懼
霹靂郵亭怵匿景烟窗詎云熄燎原古垂戒燒薶與攸
職誰人操長炬仰熾九霄側或云熒畬田火耕傳在昔
何當語祝融慎勿煎大澤轉瞬春風生百草溲滋液

過南陽贈葉丹英太守

廿年接席徵奇字千里乘輅采古風月黑無由問桐栢
眼明有分對君公喜看郭外雙渠碧愁說尊前寸燭紅
興頌載途歌九穗平生期許意何窮

是歲南陽奏嘉禾一莖九穗

晚過樊城

林水朝辭豫襄州暮抵荆野寒生地氣村火帶人聲江
接重城暗星懸古戍明無心談往事擊楫又長征

襄陽道中

黃沙白草過遶庭來共南雲趁雁翎誰向湖波愁木葉
襄陽十月柳條青

曉行

眼底落殘月提撕馬上身急程衝宿鳥短夢逐飛塵曉
氣平如水寒原暗有人溪聲聽漸近欲渡恐迷津

晚抵荊州適安安先生行部施南不晤悵然有作
六千里外韓公面三十年來衛子心到地忽判蠻洞遠

漫天空對楚江深
燈前親切諸郎話
道左逢迎過客吟
我在黔陽長北望
星輅早上莫侵尋

時公已擢貴州按察使

湖南道中口占

極目層山接茂林
燕雲吳月兩沉沉
我行迴雁高峰外
南北何由寄寸心

戲爲湖南馬歌

何人效犬立堂上
錯金鉤膺錦裁障
細看毛骨云是馬
鬣尾蕭疎固同狀
湖湘秋深浪拍空
雲帆瞬息千里中
胡爲跋涉舍長技
妙選駿足如孩童
羽書急遞連日夜
飄如驚風鳥飛下
此馬蹢躅始學行
歷塊吾愁不堪踣
平沙堆阜聞超躍
苜蓿盈槽兼服稱
稻根粳粒豈所甘

拾級盤陀力俱索君不見西極既平天馬徠八尺爲龍
七尺騄伯樂翦拂意氣動鼓車高步問門開

雲頂關

不信乾坤力難平萬疊山鳥邊初過馬雲頂又開關

新霽偕吳雨民制府富樂初閣學登甲秀樓

東嶺三更雨南城百尺樓灘聲過檻動雲氣與檐浮寒
日遲清話晴空豁倦眸勲名看鐵柱樓前鐵柱數丈西
林相國平苗所建
歲月負漁舟

南明河

鞭笞男女赭山林一寸灘身一寸金不是

聖人垂照遠南明河上陣雲深

巡撫周人駿聽貴東道
四十七之言開南明河

以通鉛運大爲民累
皇上燭知其
誤命罷之二人皆獲譴民慶更生

灘聲

灘聲來靜夜枕上欲無眠忽憶能仁寺風吹馬尾泉

飛雲洞

在黃平州北二十里

近知雲不去真有洞堪尋
暫得凌風趣還疑出岫心孤
騫秋葉脫倒景暗泉深
萬里分靄鷺湖邊憶舊吟

雪崖洞

在貴州府次南門外半里許

面郭仙源僻當窗雪竇陰
懸蘿俯幽澗攀磴出高林
雲檻涼生席煙戀翠滴襟
勾留忘簿領未許夕陽沉

不寐

酒醒窗寒夜氣清
山空人靜遠灘鳴
好風不送勞勞夢

殘月何須故故明
萬里霜天迴旅雁
誰家秋杵響孤城
那堪隣笛吹楊柳
復有高樓怨曉情

卽目

舍山無復地竟月
不曾晴淮雨全如霧
蠻煙半入城編籬
爲屋便刻木上灘
輕一飯分裘葛圍
爐蠅蚋鳴

喜安安先生至黔

楚北江無岸黔南嶺
卽天關心同雨雪
交臂各雲煙秉燭
疑今夕牽衣憶去
年頻宵倦鞍馬喜
極亦忘眠

偕吳制府遊東山棲霞寺

棲霞臺殿俯新晴
萬疊青山一曲城
龍里暮雲連北極
牂牁秋水下南明
馬卿敢詡登臨賦
謝傅難忘綵竹情

指點歸塗九霄上憑誰剗得石門平

石門山在城東兩山對峙如門

題來仙閣

雪崖洞口三層閣銅鼓山前一片溪
放眼只疑天易盡俯身翻訝鳥何低
村煙傍夜寒初合岸草先春暖欲齊
凭檻浮雲千萬里蓬萊東望使人迷

陪安安先生鵬舫齋夜飲

平池浮清齋可宜對簿書公磨蓮瓣研

公研名

我酌荷筒

盡晝夜且莫問詩酒聊相於人生聚散間難以時數拘
豈意仲宣樓作此池上居將舸雨無期今夕新月舒新
月在此處幾處同踟躕琴尊隔煙水雲際飄瓊裾誰將
關山曲浩浩通江湖

見月

蟾光不向貴陽開一月那曾見一回誰洗浮雲還碧漢
竟移明鏡上高臺關心忽似經年別破夢應從萬里來
虛幌愁人勞夜夜何如此際暫徘徊

八臘梅花甚少館吏覓得一枝因題寄意

數點關天意空山幾費尋風塵留骨少霜雪用心深照
水有同契巡檐還獨吟終須百草外別出認疎林

時歲案方

題畫二首

茅齋遠寄石林幽鎮日溪聲滿竹樓只待西風掃雲影
好從天際辨歸舟

上言金 卷一
牕外煙嵐霧雨連晴乾
臍有研池邊客心不比雲心窄
別寫空明一片天

凌

點無雪下冰絲如霧着地成薄冰其在遠山及林樹與雪相仿土人呼之爲凌按凌去聲

臘淺猶餘暖風嚴遂達臙不知今夜凌留得幾叢青

草木多不彫者時方有古州揭部案

聞黔靈山有老梅出郭十數里訪之含苞星星寂

寞相對及暮而歸悵然有作得詩二首

不辭艱阻入深山山上含苞未許攀別有性情甘耐冷
肯逢賓客強開顏清溪對影心如失荒草埋根手自刪
昨日一枝何處折雪窗雖遠在人間

天留元氣護根芽豈是空山心竟灰人到忘言無臭味

客如寬坐有莓苔何須見戴舟方轉便不邀桓笛可催
一例銜霜近東閣開春幽夢爲誰來

壞舟

有序

夢草亭前圓池數畝有壞舟艤岸命陳二聶之
旣葺矣水涸不任載意有感焉作詩以告主者
蒲荷非夙昔湖海是生平一櫂幾時壞中流何處橫榜
人前致語槎客漫勞情舟破無難補池乾不可行

忽忽

忽忽歲云暮濛濛天正寒靈雲千嶂濕疊石一溪乾地
僻霜鴻外春遲嶺樹端經時錯昏曉日遠信長安

卽事

城郭灘聲裏重雲漠漠寒晨昏憑鳥雀門巷隔峰巒歲
宴人情寂天涯客緒單送行頻北使羨爾路途難

雪

到地居然白披幃燭影斜明朝望西嶺喜見上林花

寄同門張惕菴

予與惕菴皆出嶼沙師門下茲奉使來黔惕菴方掌貴山書院使者

例不接見賓客寓黔兩月寄此道懷

燕臺歌後別匆匆咫尺清尊不暫同就暖已過衡岳外
避風只住魯門東青春雲物皆遊子白首琴書一醉翁
寄問高齋老桺樹幾時開傍絳幃紅

茶山詩鈔卷之十一

武進錢維城稼軒著

弟維屏 維喬編次

姪

鍼錯

伯炯致純

校字

子中銑

中鉦

庚寅

晴

晨光傳鳥語春色報初晴室有今朝暖灘無昨夜聲山
窗羣影得草迳一痕生幽事通花信高雲共此情

雷

不盡三冬蟄春城五日雷勢驚殘臘破光掣午山開金
鼓威何速魚龍氣已迴青旂將柳色都逐發生來

登廉使廨後山

雲際天涯眼春迷嶺樹間斜陽不到地新月已臨關使

節依甥館斑衣老客顏始知金筑里非復釣臺山

桐廬縣廨

後亦有山二十五年前趨庭地也

立春口號三首

昨日臘盡今日春長安城頭月色新東廊學拜小兒女
雲重不見天邊人

亦知風花無近遠其奈雨雪太紛繁蠻童打鼓苗女唱
泥滑滿街難出門

豈是遠道定寂寞也覺新年多送迎高門玉盤阻勝事
比戶金旛隨世情

晚眺

雲頂隨登眺天涯起嘯歌城連蠻墅小山見夕陽多春
樹將遮屋寒溪不到河無端遊子意歸鳥近身過

題畫贈姚香荳太守二首

意中江水望中樓烏撒天邊作卧遊何日春雲生馬首
與君同過北山頭

黔溪煙樹鎖寒墟畧似瀟湘夜雨餘著個扁舟雲水外
他時真釣武昌魚

送領隊明將軍北上

萬里歸來百戰身將軍走馬踏芳塵天涯亦有花生日
俗以二月十日爲花生日肯使垂楊自送人

破諺今逢三日晴故人握手眼逾明
眼明翻有長晴恨容易征車得早行

花朝

一枝芳信破蠶烟樽板遙分蜀國絃
他日春城最相憶東風拋散汴郎錢

素心蘭

丰神不信人間有落魄何緣此地開
非是浮湘來萬里一生空負別花才

出東郭數里遂登相寶山

東風喚我出出自東郭門冰雪曾幾時
升木各已繁人生共百物感此春氣溫
曲徑黃城隈花溪隱茨垣興情

亦兼采寧惟滌塵煩往往狎童稚敢詡高車尊一峯擢
花外螺髻簪芳蓀漸覺紅翠疊不知陟屑雲憑巔攬生
態禾隴如鋪茵方疑聚田鳥乃是扶犁人南望瀾滄江
祥颺靖祇氛遙知牛羊棚同我桃李村番酋貢馴象綵
棚列城闌詠歸間凱歌豈厭士女喧何如東山展千載
風流存

出郭登山復成二絕

村徑繁紅高下宜野人日日坐茅茨桃花盡在春風裏
却問桃花自不知

豈要天花作道場拈來微笑問東皇衆生亦此人間世
莫羨山頭是上方

清明節登相寶山和兩民制府韻二首

禁烟節後柳烟斜人在天南倚暮霞
傳道日邊春信好東風吹徧碧桃花

多謝東山最有情留人未肯便教行
何須陌上紛紛雨燕樹吳雲已不明

三月望前一日登來仙閣見月

幾番憑眺恨烟迷今日來遊日未西
坐久不知花樹與柳梢明月下前溪

寄懷張惕菴

雨雨風風送暮春繁花開徧未相親
來仙閣上將圓月猶照城南獨夜身

和雨民制府登東山疊舊韻之作

傳聞小隊過山家
石屋題詩點筆斜
似我得閒常抱病
兩崖空放刺梨花

刺刺葉如黃刺藤而稍大花類
月季色淡紫蒂上刺如針密

題畫扇贈雨民制府

黔溪千疊滙南明
曾是當時秉節行
十載重來春澤滿
溪聲猶作玉琴聲

和雨民制府雨中登來仙閣原韻二首

軟輿泥滑出城灣
草閣風寒且未還
蓑笠老農渾不曉
只疑來看雨中山
爲愛新疇碧繞灣
雨時坐到霽時還
若無淄淄前溪水
誰對童童舊日山

與外舅話大瓢先生軼事有感

一泛詩瓢五十秋西窓剪燭話風流黔溪萬里他年月

復照吳門鄉思樓

大瓢讀書樓名

發貴陽

古州係雍正七年新開苗疆十三年二月復叛乾隆元年五月討平之

五十始從戎立身愧不早軍書夜刺閨行色頗草草苗

民偶不靖豈足窮追討所慮司牧輕赤子轉驚擾

皇威震外夷萬里若振槁矧茲新闢土卅載遵

王道何事弄戈矛舍爾藝黍稻使者輕騎來要釋懸如

倒防身有長劒不必倚穹昊

二十日晚大雨上登高嶺

薄暮望前山雲外已無路行行忽不見乃在雲中度燈

光不及尺黯黯迷前步但覺身仰行萬丈凜一誤天低
雨亦近倒下信如注攀磴盲橫流企踵進瀑布人生陟
顛險崩迫於此遇迴念從征人吾猶得安寓

三難灘

山行似涉波夜雨漚行幪晨下三難灘翻似墜峻阪凌
濤沸起伏盭盭走雪轍其聲山同摧其勢電俱轉扁舟
擲梭過百里不一飯埃吏馳戒書前舟鑑非遠軍行爭
瞬息振舵矧已晚滅頂非所安忠信吾豈短

下江營

窓中見戰場下馬人血腥壯哉子母砲活我羣生霧軍
吏指示我城邊列三營前者賊驟發漫山逼前汀口內

銜長刀欲渡無隻舠其時大澍雨陡漲翻滄溟飄屍隨
流去衆驚乃奔星從來天助順么膺敢逃刑况茲兵大
集前驅若雷霆爾苗自作孽善者試靜聽

下黨根坡至加額

連山根雲生飛鳥苦無道盤旋下黨根行蟻迹巔草已
謂達溪腰仍踞衆山腦加慕稍就夷加慕寨名從此益深窅
破荒開闢後鑿空扶輿表諸苗語侏離樽酒頭如搗嘉
茲能慕義田廬飭自保翹首朋論山尅日將搜討

夜雨

別將追逋逃向晚發密箐濃雲羃四山何以取微徑三
更復大雨達曉未曾竟念此行者艱益我居者病從來

狐鼠輩往往匿深筭天意或有由一洗窟宅淨坐起不成眠急足爲我偵

得邵闇谷書

朋論山半戟如林猿鳥悲愁萬壑深靜夜營中但吹角美人天際獨鳴琴飛鳶欲墮雲邊目雙鯉能開瘴外心欲識從軍近來事燕臺沽酒待相尋

黨根坡駐營

黨根坡迴上青霄月照營門氣沈寥夜半鼓嚴傳密語前山攔子捉香要

佳居回兵卽事

滾塘十二接佳居舊是鴻濛未闢餘

下江都江也江外爲滾塘十三寨其

苗獷悍不奉徵調雖稱熟苗與生苗等逆苗香要居黨
堆寨在溪塘之中過此歷加募九申等五寨至佳居則
爲生苗路徑艱阻鳥道羊腸未足爲喻其苗純似孫竹
獲連山密箐非復人境開闢以來官兵無有至此者
裏稱王聊復爾草間求活竟何如將軍只縱炎崑火使
者頻飛喻蜀書南海待標新恩柱
天威肯盡釜中魚

自下江營回兵

城堡催螺角樓船轉戰旄密林封寨黑亂石砌灘高天
險思重閉邊情愼急操畱屯軍信少回首寸心勞大兵既撤
仍畱軍四百屯黨紐九申之間控佳居險要斷熟苗勾
結之路比日軍報殊少瀕行諭下江遊擊問日會哨以
勢聯軍

苗寨中亦有梔子詩以詠之

難消白雪閉銀牙不斷生香有樹遮誰與同心堪作結
暗巖幽洞自開花

憩園荷花疊前韻

火雲千里射高牙玉帳無塵羽扇遮未試錦袍酣一戰

却來池上采荷花

用浙江書生以詩謁苗帥句意

古州卽事

時香要未摘佳居尚未就撫

三江戰艦罷南來

三江都江溶江車江也會于古州入廣西

六月戎車漫北

回漲海尙勞余靖檄炎風獨上武侯臺

舊傳武侯屯兵于此壘石爲基

高三層苗人望之輒下拜今在同知廨

欲銷兵氣惟靈雨

時苦旱

肯把詩情

付殷雷多少窮猿猶失木麋弓還藉撫殺才

香要摘

一夫作不靖其氣干天和四野如燔柴吐毒虺蛇過我

心苦執熱無地尋風蘿今朝忽有喜縛魃深山窩憶昨

始搆患逆徒何其多三千青纏頭

苗俗俱以布纏頭分白黑花紅之種赤

足超陂陀行尸踣鬼馬

香要所乘即被殺土弁栗大成馬

指揮雜譙呵

身穿大蟒衣脚踏豪豬鞞

苗人俱赤足香要于惑衆受禮時則蟒衣著履挑健

泗刃出天噴決銀河濤頭三五丈噴崖灌蜺窠雷霆正

鼓怒砲火仍交加洞胸及破腦飄轉隨流沙星散各求

穴風傳競拋戈自此大褫魄我武訇鳴鼙爆空烘伏鴟

掃迹剗蜚螺乞身向狐黨狐黨相喫囉自不保署領矧

敢招禍晒

王言赦脅從玉石各有科一紙十萬師不用旌旗摩骨

月自斷腕兒童解驅饑零星棄妻子先後俘娘爺飛走
路竟絕漫天觸目羅塊僵大樹孔坐待霜刀磨懷中斷
腸根欲嚼關其牙憲典猶未彰鬼冤得遮拏南門演武
塲燈火輝光華整軍肅凜凜列戟森戢戢前行奮擊鼓
後隊催鳴鑼膾膚十字木縷血千條麻是時天收暑萬
里澄纖阿觀者壓肩踵臚歡且騰歌上歌

帝仁聖善惡無偏頗作孽絕厥世順者安其家下言民
感激熙熙樂生涯從此四海內孰敢萌姦芽旣秣雪山
馬還清炎海波寬猛協水火作息守田禾明朝視天宇
霈然下滂沱

喜雨

十日不雨龜坼町溪乾日炙魚蝦腥妖胥已斷魃無氣
神首乍擡龍有鬚衾稠換米且邀客刀劍鑄牛爭戴星
年豐民樂更何事只陳干羽休雷霆

題畫肩反歐陽公意

占盡笙歌學語時畫廊粧閣聽來遲東風七里嚴陵瀨
啼斷春山那得知

七里瀨
產畫眉

來碧山房偶作

廊檻高低樹木疎閒雲恰受一窗虛若無公牘時來往
何異深山靜讀書

狗牙花

木本葉似桂花如茉莉而蒂長無
香云戴之可治小兒驚出廣南

白雪抽牙綠玉翎只輸茉莉晚來馨名稱難入嵇含譜

合補神農本草經

苗歌引

童句男女各十人聯手而歌一人唱衆人和以
器倚之男司器女司歌旣而男女迭歌如答問
者終亂以器吹者蘆笙二頭子一提者胡琴二
彈者阮一越琴一三弦一琵琶一不知名四弦
者一此爲細樂其粗者截竹爲悶笛大小各十
數合衆器奏之而不歌聲甚雄壯若鐃吹云

木綿抽縷輕雪霏滌池漚藍斑竹機翻葩疊勝裁舞衣
花娘二八長短齊銀圍項臂耳墜螭倭髻左髻銜半犀
合衿束素緊稱肌湘紋蹙摺畧下垂迴風舉體蛺蝶飛

馬郎執伎前後隨

謂少年善歌者

蘆笙竹管山繭絲回回却立

排碧墀調簧轉柱徐吐辭綿蠻現曉嬌嚙顰舌清喉滑

亢墜宜引聲乍歇和者遲欲斷不斷若有思秋根涼叢

零露晞轆轤牽井絡緯啼淒音促拍聽不疲手口合一

無差池攀拳踢足搖兩頤歌不能解意寫之妖花揚艷

明月暉洞門朝開夜敞扉男女跳浪紛酣嬉俗固如此

君莫嗤唯鳩黃鳥化所基轆軒采補維南詩

春為跳花秋為跳月

示官吏

聞貴陽城外侃民口聚數千大戶釀金賑窮官吏無過問者因示之

困獸林初伏哀鴻澤正號力疲難盜賊心死但溝濠客

省西江遠

時方議糴米鄰省以供平糴

官厨北斗高忍看未寒骨蒙

袂對黔敖

古州回程

火雲炎嶺轉千層屈指來時路積冰豈爲關河添白髮
未甘歲月費青燈書生漫試論兵策肉食難忘射獸能
已擬長楊歸獻賦木蘭秋老聽呼鷹

立秋日晚坐

秋至自何處颼然庭樹幽風疑楚王苑月卽庾公樓
多陰雨見獨夜有今日他鄉復古州明朝整鞍馬直北
月順不易走長楸

六月雪 草花名

山高豈是窗依日溪遠何由水透衣四面迴風吹不快
盆中空有雪花飛

異俗

地入蠻夷僻人分鳥獸栖斷虹常起屋

云此卽是瘴

渴雨不

醒泥

以無平土水不能存

溪路行穿石山田疊作梯民情寄通事

當面隔重隄

富樂初閣學新制寶刀詩以賀之

牛斗先成象蛟龍乍發鋸追魂命歐冶超代得王祥四海無魑魅同心有驢驢太平麟閣上萬歲奉吾

皇

棕竹

品在蒼欄翠篠間篩風舞月致蕭閒長安待爾裁團扇不愛湘妃有淚斑

紫薇

印澈泥痕雨後鮮
芳名贏得省中傳
今朝見我應含笑
曾護朝衣有七年

玉簪

何事回頭墮碧除
脂香猶憶采蘿蕪
燭殘休向臣肩掛
舊是高陽一酒徒

美人蕉

夜來紅暈曉難尋
綠帳如煙只自深
欲賦秋聲空輾轉
文心那及美人心

芭蕉

雨後初抽片片多
弄姿故近研池波
濡毫便寫新秋句

看汝翻風舞若何

夜合

木本葉如栗花六出形色俱如百合大如檉磬口外緣辨三卽苞也其香清而遠南土花

此爲第一

玉質幽宜入夜看香清能使暑風寒神仙只住瑤京上
可笑人間有合歡

荒村

斗米千錢少蕭然滿四郊更休防寇盜只有委蓬茅骨
月吞聲別冰霜轉瞬交不知來歲燕尋得幾家巢

再詠夜合花疊前韻

世外風神耐久看別來可覺曉粧寒人情只說紅顏好
折得芙蓉贈所歡

促織

促織亦多事階前故軋機似應催久客不道換征衣吟
苦心多曲線長緒易飛叮嚀一片月砧杵待人歸

夾竹桃

湘水花源面九疑霜斑風片引人思欲知絕代幽棲處
翠袖天寒獨倚時

曉行

階蟲聲一概那復辨鳴雞霧磴行時在雲峯到後低燈
昏頻失路衣濕屢沿溪稍待林開旭前坡縱馬蹄

晚行

客程殊未息村路幾人逢涼益秋原靜晴仍夜氣濃亂

雲深古渡落葉滿疎鐘不是無幽興緣蹊探鹿蹤

夜聞蟬

汝飲是何物所棲何樹林三更羣籟寂對客故高吟
煙火原塵味池臺豈素心從來善鳴者空外有遺音

自古州至鎮遠皆得雨秋收有望誌喜

皇天轉圜心一息判慈忍呀口半死民那得不垂憫
急徵奔雷龍高下力惟盡枯苗失乳兒皮脫毛髮隕點滴
已爲膏塗涌不待吮拔節苗有聲灌顙粟起脰飯香滿
到口在野如在困流離去速返溝壑死猶賑莫放翳帶
寬且耐兩月窘

山行遇雨

觸熱午行倦涼風忽滿衣
雨深山易失雲重鳥艱飛
磴石何妨滑林虹且莫輝
好添溪澗急前路放船歸

上百鎖高嶺

籐危猿共挂道窄鳥分飛
天色螺中轉雲聲掌上歸
高泉還濺帽低雨不侵衣
欲俯清江曲塵寰一翠微

清江地名

雲海

羣峯沒何處積水繞天低
誰鼓成連曲扶桑移向西
氣吞蓬萊閣

登州觀海市處

足濯桃花溪

在黃海有溫泉

日出波濤淨雲

山路不迷

入湖南境見穫稻者

湖南號米鄉一歲能三熟
今看早稻收晚者蔚猶綠
旣

充公家輸還輓黔中粟黔中米大貴千錢不兩斛灘水
一帆通源源可相續庶完分路家兼長委溝肉大官無
歧視君子恥爲獨征夫無所事飯飽睡亦足

已過黔陽溪水漸平頗得舟行之趣

灘聲喧昨夜雨過曉烟微一水自然去孤帆相與飛岸
雲低著席渚葉落當衣輟棹深更後沙涼步月歸

溪行十二絕句

舟下九龍水舵尾倒牽纜誰能逞意時制之不得逞
小鳥有何事暫止輒復去灘頭雙白鷗久立不移處
峭崖束一水水急鳴咽鳴君看前岸寬波平水無聲
灘高如登天進尺退反咫不見前灘船已在青天裏

下水遇順風布帆何不安船人踞告我前頭多暗灘
今日風色逆風逆君莫嘆好將掛帆力分與上灘人
剗盡灘中石舟行應自如惟虞一瀉盡秋至轉無餘
巉巖灘中石終古元不改君看磊落人中流鎮長在
沙水蕩石根穿穴如戶牖想見有心人鑽研用功久
繩急則自直水急則反曲過直繩易傷多曲水乃蓄
灘高發正暴石觸使之怒靡靡隨波草去去不復顧
石激灘益怒其勢如排牆所以委宛人用直亦有方

灘行二首

只怪溪流不肯流萬山飛影送扁舟我心自比溪流急

一夜隨風到朗州

定于常
德陸行

灘高見說行人恨我恨灘身尙不高比似銀河天上落
星槎早已涉秋濤

自辰溪至桃源山水清絕口占六首

水自端流舟自橫石尤情重故人情溪山如此畱君住
便不能畱且緩行

將錢買酒觴舟子醉裏憑君嬾散行不見青山白雲外
人烟多處是州城

朝起蓬窗自喚漁科頭露肘袒雙裾溪童一見却相笑
何處官人來買魚

翠峒晴沙動碧虛人家都在鏡中居遙天鴈度飛鴻影
不及鷗行炯自如

小景漁村寓意親晉卿風致箇中人塵顏他日休相誚
曾是王郎畫裏身

洞口人間共一溪野情彷彿認前蹊漁郎豈是真忘却
太守何人自昏迷

沅州弔王龍標

山鬼荒厨敗葉吹夜郎遷客不勝悲沅江日影寒鴉暮
猶是龍標怨女辭

咏古雜詩五首

萊公泉

在常德府城北甘泉寺

蒸豚饋客愧前賢同酌清流祗後先千載寺門烟翠鎖
不聞人道晉公泉

馬伏波

墮水飛鳶馬革身明珠薏苡辨難真等閒莫受床前拜
舊日兒郎今貴人

龐德公

熟計安危遺子孫鹿門歸去有山村他年魏武嗟肫犬
劉表何曾解此言

孟浩然

雅愛自能親杜老才名何事後王維果然一語誣明聖
貴主筵前未獻詩

昭君

一女和親竟沼吳未將歌舞賺單于香溪夜水琵琶語

羞逐鴟夷泛五湖

武陵舟中懷樹叅

湖南佳絕武溪舟恨不攜君此共遊客自漁郎聊信宿
人今桃片幾清秋夕陽任渚看雲立明月斜橋聽雁愁
一曲離騷酹江水孟河西上是常州斜橋邑橋名與做
入常州城江漲則水
西流郡當有大魁者

遙望長沙弔屈子

江涵秋氣楚帆開山遏高風塞雁迴舊是大夫哀怨地
至今香草爲誰栽魚龍欲化愁邊瑟雲雨常迷夢裏臺
解得二南能好色可知三戶定多才

賈太傅

餘才竊試誅鼂錯正誼徐陳遂仲舒豈是洛陽年尙少
須知大漢治終疎何來怪鳥還成賦欲問蒼生有上書
異數獨承宣室召祇應憔悴勝三閭

渡江

湘漢無情水滔滔向客流白雲東盡海不見海東頭烏

喚南園

余故居

曙鴻驚北渚秋他時寄巢

余都中樓

望應惜

此扁舟

荊州恭謁關大帝廟

一州勢繫三分重百戰身存兩漢功誰使卧龍先入蜀
終教赤帝斷歌豐山河在手生徐晃天地何心罪呂蒙
惟有尊王千古義霸旗風雨永安宮

杜里

杜子南遊葬水湄里門今對峴山碑
風騷絕代歸無所
江漢同流去幾時
兩地空留王粲井
千秋誰醉習家池
嗟予願學頭空白
撫蹟長吟獨淚垂

望峴山

共有千秋恨如公尙愴悽
西風重洒淚落日峴山低
問俗荆襄在尋碑
魏晉迷休提小兒
女唱否白銅鞮

諸葛武侯

若非天下士何以弔先生
魏晉無良史雲霄自大名
三分才盡紉五丈恨難平
惟有陳同甫能深酌古情
同甫酌古錄歷品古來名將計其勝負之數獨於武侯無間然

來歎故里

大事非生死虎牙何敢然
尙聞書繭牘不肯拔龍泉
故壘黃河外荒村白水邊
雲臺當日畫寂寞恨星躔

二十八將

監護不與

聞兒子中鉦自蜀赴都

有客來新鄭途中見衮師
弄雛畱峽樹將母上京帷
楚雨秋多滯燕雲晚更移
天涯復岐路初月判人思

食瓜

可愛襄陽蒲鵠青流傳必是楚江萍
客從夸父天邊過不羨相如侍集羈

過南陽瓦店偶憩道旁書舍主人出謁貌頗偉須

眉皓然自言姓錢氏名暉字瑜齋爲郡諸生年八十一矣五代一堂孫曾數十輩有田三百畝躬自課耕衣食僅足而已然不廢讀書食餼者蓋五六焉余肅然敬慕者久之因贈以截句四首

八十過頭筋力强偉然鬚鬚貌堂堂吾家代有青精飯
座上人驚是少陽

持門新婦丈夫强翁新續要五代怡然共一堂莫怪草廬人

不識躬耕原是舊南陽

江南河北一宗强文采同稱君子堂矧是思公畱守處
舊時賓從有歐陽

吾親八十亦康强

天筆曾邀錫草堂與翁若共香山會又見耆英說洛陽
與南陽太守葉丹英夜話

客歲初冬共酒卮寒更未轉復風馳重來忽又新秋節
話舊還如隔宿時半載音書無雁到長征心曲少人知
黔山霧雨苗溪瘴添得星星鬢幾絲

晚過湯陰遙禮岳忠武王廟

月黑湯陰道雲扃岳廟門大風方鼓怒長夜不埋冤沙
漠誰君父湖山自子孫獨將孤憤氣洒血問乾坤

偶憶田疇舊事有感作

諸葛綸巾實名士管寧皂帽亦風流先生已賣盧龍塞
博得高名不受侯

奉

敕題周編鐘分得七虞

黃鐘

世治宮聲出稽年
芭水都鎬京畱業虞

璧府儷盤孟始作四懸
備旋生萬化俱諧音
探樂本元氣滿寰區

環翠亭看菊

故人如黃花隔歲不相見
今來邀我坐杯酒
悟流電長安塵土多華棟
葢深院幾人却車馬
擺落赴清讌
毋令澹蕩姿又阻疎籬面

九日獨往園登高

頻年九日度中關
浹歲馳驅萬里還
塞雁欲侵長砦月

楚江不向大雷山家鄉綠酒何時共天畔黃花幾處斑
同上高樓看西嶺浮雲落葉笑塵顏

應

制題李廸春園遊騎

限長短句

月林橫疎枝散轡踏空綺未涉園中趣已契絃外旨闌
干竹掃鏗韻清寒厖不吠如欲迎得非華子岡頭夜歸
處暗香一卷詩無聲

贈羅冶亭

張篁村弟

我愛瘦竹生善畫繼子久示我運筆法力到氣乃厚中
間得趙子脩五亦篁村弟子斯道實先後冶亭淮上來清爽刷
凡垢一片江南雲蓬蓬懷中有家鄉夙夢想豁爾通霧

牖不用半帆風漁竿落吾手告歸何局促良會竟不偶
欲共談瀛洲烟霞空在口瘦竹吾所師趙子吾所友期
君師友間足以同不朽

羅旭莊出守德安詩以贈之

韓蘇皆作郡大雅接前修臺閣天中禁黃隨楚上游新
晴開夢澤舊雨暗瀛洲暇日應篇翰雞林有客求旭莊
好爲

應

制題名畫六種限各體

范寬羣峯雪霽七律

樹合舟凝殿閣深華原潑墨寫寒岑北風涼得劉褒意

西嶺晴涵杜甫吟漫向輞川尋粉本應從閬苑識瑤林
品同快雪義之帖邀請

陽春作賞音

顧安拳石新簞

六絕

幾點蜂窠磊磊數莖鳳尾娟娟不必鶯溪買絹已看玉
版參禪

米芾齋頭一品庾信園中兩竿墨譜似分清悶畫樓應

號瘦寒

題云寫於
瘦寒樓

黃公望雨巖仙觀

七十

虞山老人墨花舞雷霆無聲起尺楮疑是風吹拂水巖
湖波噴作高樓雨雨外雙峯忽欲開烟中萬樹紛如苔

峯離樹合水紋動中有靈氣從空來老人自言性最嬾
坐卧閒雲一窗滿誰遣蛟螭腕底生潑灑淋漓不能管
晚年愛作富春遊富春長卷晴光浮晴耶雨耶一翻手
化工漠漠夫何有

姚公綬竹樹春鶯

五律

何處金梭擲幽篁古木間半襟翻曉院百轉度綿蠻不
隔春山遠如催淑氣還花深應選樹園柳有新顏

文徵明蘭竹

騷

若有芳兮澹微竹蕭蕭兮風度之飄婀娜兮柔姿蘭之
莖兮紛披緬幽欣兮如訴秉貞節兮懷思羌移根兮瑤
阨溯春光兮秋期寧空谷兮悵別薦馨香兮瓊芝停雲

館兮何許湘之濱兮澧之浦沐芳華兮惠來湛三霄兮
露清

陸治雪後訪梅 六律

山陰清興初發漁父扁舟試擎重碧爲拈新酒小紅更
訪繁花南枝晴映斜日西崦烟凝暮霞誰道石湖春早
不如湖岸寒賒

東坡先生墨妙亭詩斷碑陽明先生刻其側曰龍
塲驛署尾研今歸裴漫士來索詩因爲長句

斯文關天天不變文忠斷碑文成研事功學術非兩途
黨焰貂氛與磨鍊幾經劫火燒不得前宋後明猶對面
此碑此研平無奇在於兩公安取之愛公不見重公物

天球大訓同昭垂生前坎廩難自保身後譏評何足道
儘多鳳鼎頌豐庸轉眼麒麟沒荒草乃知碑研豈偶然
人心自結璠璣寶一池磨盡古今人古今幾人名字存
端溪水溢老坑竭世上筆札徒紛紛我題此研三太息
半生冤抑干九墨

奉

敕題雪中花卉

臘梅

天竺

山茶

月季

庭霽猶餘雪紛從枝上看黃欹封蠟瓣紅亞壓珠團仙
茗宜舒素長春最耐寒是誰傳粉本瑤圃玉闌干

應

制詠周從鐘

限十一真

銘可識者曰大寢子鯨自作其從鐘五金吉金呂
眉壽多福萬年無疆子孫永寶用享

編分鳧制古紐辨蠡痕真文在干惟呂年深鑄自幽五
金甌吉齊六律驗從均眉壽銘詞好元音萬載春

小除夕偶作幽壑茅堂圖贈慶雲溪兼題短什
人聲爆竹併如雷何處能尋避債臺只有深山茅屋裏
應無剝啄到門來

辛卯

戲師行

金聲嗶嗶鼓聲亟猛風激火異獸擲是何矯健若有神
騰踔虛空豈人力一師稍大兩師小五綵繽紛煙氣繞

布幃八尺勢千尋翻身蹴踏天地表昔年曾聞貢大秦
虎圈餒肉狎且馴及觀威儀足駭絕翻疑說者非其真
滿堂屏息立負壁晴宵忽驚烟霹靂動搖山嶽沸江湖
瞥眼一躍萬籟寂

題折枝梨花寄吳雨民

夜月朝霞各伴粧春華秋實共當場東風自解催紅雨
豈獨天桃結子忙

秦劍泉學士見贈端研印色詩以謝之

向日烘成出水裁榴花蕉葉燦然開姓名特與添新色
筆墨從教絕點埃顧我真慚書畫手煩君虛費練磨才
惟應珍重齋頭供一日摩挲一百回

應

制賦得大禹泣臯

得慚字入韻

禹功初紹治帝德實先覃方懋安民惠寧虞虐吏貪下車亦偶見泣罪有遺談念此朽楊苦能無涕淚含勲華去未遠岸獄麗何堪命自艱鮮續情猶飢溺孰惟期協於一敢忘赦之三

聖世中天再欽哉奉職慚

應

制賦得泰山不讓土壤

岱嶽高無極青霄上幾重基非緣漸積望自合羣宗艮體虛多益坤維秀獨鍾詎曾辭一簣儘可納諸峯邱垤

皆通氣雲霞足盪胸爲山誠罕譬
授土亦兼容弱每慚蚊負卑寧棄蟻封

聖懷天共廣贊擬更何從

登岱

祖脉廻環開九埜層霄迢遞接三門
登臨自爾乾坤小氣象懸知道德尊
信有吸噓通上帝可無雲雨慨中原
此身已到青蒼裏肯輩諸峯作子孫

奉和瑤華道人泉林雨中乘馬原韻

陪尾泉澆十丈塵况逢好雨及時新
雲從馬首封青嶂烟與鞭絲習碧春
逝者獨參川上旨誰欺深契米家神
清吟解得枯苗渴愧作行廬卧聽人

奉和瑤華道人山邨阻雨寄宿原韻

聞道行旌隔昨宵
暗雲深雨望寥寥
此時美酒無人共
何處荒邨有客招
天遠還疑叫鴻雁
漏長只訝滴芭蕉
詩情不及西窗燭
得逐巴山句裏消

題吳香亭古藤書屋圖

有序

紫藤一株王新城
尙書手植也後爲
僧父斫去
香亭寓此復生

漁洋去百年手植乃未死
豈無削迹人愛惜
賴君子在人不在樹
榮悴各有以草木本無知
亦解託知己冶城
柳未枯水繪園則圯
但取風雅存園柳
同一視余齋亦有
藤不識誰植此
今日已無聞
後來何足紀
畏安四月

春幾處花開紫

雨中過聚星堂題盡

翠微羞見客朝夕不分明
賴有風驅筆當窗寫快情

七夕作山水扇子題寄謙之中丞

針樓啓虛岫曠然見平生
緬惟少室雲同此西嶺青
宿雨澄昔夢新鴻惠遙情
楫題託懷袖永奉仁風清

吳門月爲沈節婦作時節婦依其兄於陝

依依茂苑花皎皎吳門月
天風下秦關吹作隴頭雪
隴雪白皚皚陽光照幽崖
銜蘆趁霜信飛落懷清臺
育子畏風雨營巢謹牖戶
精衛嗤杜鵑何事但啼苦
血亦不可盡海亦不可乾
桑田種若木莫謂松枝寒

讀顧赤方六悔詩有感

有序

六悔者輕讀書妄作文不力田泚言貧醫則昧
道未聞也赤方逸士所趨不同辭旨亦異焉

一日不再食我腹知苦飢楊然乃在心窮年慙莫知日
月雙跳丸不爲情竅遲耳目漸昏閉束髮成素絲哆口
責兒童兒童反唇稽掩卷徒咨嗟逝者已如斯

壯心不自死抗懷有所陳但覆後人甕已闕今日文惟
恐隙光暗隨手空飛塵呵氣着髭几轉眼無迹存金石
稱確堅尙有磨滅辰吾生若空花爛熳亦苦辛梨棗未
呼冤楮墨得毋嗔

故山本無信告我菑畬方少小守兔園石田亦已荒一

家數十口嗷嗷仰天倉杜陵未爲貧東屯刈雲霜逝將
返初服言尋土妻莊磳确不可得豈惟筋力妨徒懷樊
子願寒空鳴雁忙

出門盛衣冠入門仰屋椽所愧妻孥諒下機爲我言昨
日大風寒庭樹枝葉殘寒衣不在笥卷起爲盤餐平生
金石交披豁露心肝涸轍仰西江道遠力不前畱侯信
智勇赤松與盤桓

大藥在精氣寶之五十年牙脫毛髮焦况可希神仙本
無洞垣術妄讀靈樞篇醫門多費人嘗巧非所安俗手
不知懼怒馬紛堪憐公乘今則亡古先秘無傳安得一
刀圭長侍高堂前

六經無閼旨大道在日用胡爲聰明人遁入虛無空彝
倫具實地經術非口誦澤不及羣生終身歸夢夢先儒
談名理標榜輒自頌慚愧三命恭曾無一言中嘆息楚
狂歌何由見威鳳

銅雀瓦研歌

鄧侯蒸土模龍鱗未央宮成漢高墳幾經燹火橫燒後
此製却在漳河濱老瞞呵劍擬赤帝吾爲文王足吾志
不知靈園鬼羹民可有高臺香履伎同槽三馬翻河津
大討石出天書真可憐壽棟鴛鴦影剩作文房鴉鵲痕
萬錢一片千年土曾入宣和殿中譜譜中鼎鼐皆周秦
花石無綱化秋雨車駿馬踏蚤吟哀錦襲重收歟後灰

蒲坂聖人翦茅草不爲人間畱研材

楊曰生小像

鬚髯戟張楊曰生蓄眼豪傑唯老兄卓錫無地不言窘
曹娥江邊風雪平啖瓜瓜是孤兒血血枯寧向長安沒
蘆衣欲墮閔車霜玉簫幾隔秦樓月多年飢驅蹈東海
海上公孫故人在鵬鶚憑將鼠璞驕驕驕怕不鹽車載
白衣蒼狗須臾過萬事轉燭飛烟波但見高樓作平地
幾人赤手卷黃河卜式輸公非所樂有田可耕子可教
白眼看人酒一杯荷花出水爲君照

晚香玉和邵敦之

此種來自塞外

早說木蘭回紫塞幾時雍伯種藍田月寒跳脫初垂手

酒暖襜褕欲挂肩，每伴口脂薰枕上。
未通眉語落箏前，靈芸絕代誰曾見。
越到黃昏越可憐。

題菊花雞冠

危冠野服守柴關，秋色如春有妙顏。
夜半霜空還起舞，誰能獨自看南山。

壬辰春帖子三首

浩浩東風遠西逾，烏壘城來歸十萬戶。
歌舞助春聲。

元日青旗剛送喜，綵符占勝合丁壬。

歲壬辰月壬寅日丁酉五行書丁與

壬合合者萬事吉普天坐享熙春福，可識

深宮保泰心。

御製開泰說以乾之九三釋泰之九三以乾惕卽艱貞爲保泰之要道天道人事

盡備於此

臘雪綏豐次第來星占得歲瑞光開朝正雲物三霄麗
福曜循環又四回

歲星十二歲一週天三十
七年爲第四週天之始

壬辰

題劉芬腴磐石坐釣圖

芬腴本姓岳以逃名
習岐黃年八十矣

大道在冥漠探求無成心手中直釣釣卽是無絃琴清
溪匪濠濮樂許靜者尋楊柳多好風悠然開素襟先生
忠武後遺世耽幽歆直契軒皇上時吟北窗吟餘事乃
活人一洗俗手鍼我欲從之遊陳灣阻且深

陳灣山芬
腴所居

緬此蘭蕙質慚無金玉音

題丙戌歲爲樹參弟所畫山水長卷

山川在心不在足何必舟遙遙車轆轤雲烟在手不在

眼何必圖千重書萬卷黃雀啾啾食太倉有時決起鴻
鵠翔蓬萊晝長一事無仙人招我遊博桑海濤涵蕩起
胸腹石上無琴有其曲神風離合引毫尖天地無端歸
一幅餐霞散人適然笑行持坐把看不足要循舊例翦
茗溪曩曾作茗園遺雨冊子相贈好訂前期棲鄭谷生如麋鹿亦受
驅夢爲蝴蝶非故吾何時青鞵繫兩趾直過白岳誅茆
廬蒲團松老或可坐靜對三十六朶青芙蓉此時與子
更寫作別有雲海浮天都

茶山詩鈔終